

CULTURA

A Moena la biblioteca à na neva responsabola

Valentina Manica é stata touta su per n an per corir la encèria de Maria Piccolin jita en penscion. Endèna vegnarà fat l concurs. Col nef orarie la é averta al publich ence la sabeda da doman

Col prum de firé la biblioteca de Moena à endò avert si ujes con na neva responsabola, che à tout l post de Maria Piccolin, jita en penscion do 34 egn de lurier te chest presidie culturèl de paisc.

Per manèr inant chest servije, endèna che vegn enjignà l concurs per corir l post a temp indeterminà, l Comun de Moena à tout su a temp determinà per n an Valentina Manica, che la era pruma te la graduatoria de n concurs publich fat tel Trentin, a Canal San Bovo.

Sion jic a la cognoscer mingol per la prejentèr a la comunanza.

Valentina Manica ti ultimes egn l'à fat desvaliva esperienzes desche bibliotecaria te più lesc del Trentin, soraldut a Trent, a Rorei e a Lavis, dant per servijes che vegnia esternalisè a copratives e do desche dependenta de vèlch comun.

La ne à contà che chest lurier ge à sapù bel e canche l'à vedù che l era l met de proèr a Moena la se à metù en jech per la neva endesfida de gestir na biblioteca da responsabola.

Per tor su la neva encèria a Moena no l é stat l met de aer n trat de temp olache Maria Piccolin e Valentina Manica les podesse lurèr ensem a per se passèr con calma l testimonech, ampò les se à cognosciù e Maria Piccolin l'à abù l met de ge passèr mingol de informasjons utoles per tor su l nef lurier.



Valentina Manica, neva responsabola de la biblioteca de Moena.

Ela ades la stèsc forin Fiem e no la scon la speranza che chesta encèria posse ence jir inant, se dut jirà ben, aboncont endèna la conscidra de gran valuta poder fèr chesta esperienza. Per sie cont l é n muie emportant poder se fèr ite con la

comunanza, che la vardarà de cognoscer di per di semper mic; endèna ti prumes dis de lurier l'à jà podù cognoscer mingol de jent e vèlch clasc de scoles rué con sia maestres, e ai bec l'à podù ge proponer vèlch letura che i à aprijià.

«Gio peisse che le biblioteche de publica letura, soraldut chele che no é ti zentres maores, le é n muie leade al teritorie e a la comunità, e donca aer n raport uman do e do co le persone e co le istituzion scolastiche l é fosc amò più emportant

che aer a la leta l ultim liber vegnù fora.» No la sà rejonèr ladin, ma da vèlch persona ladina che la cognosc l'à jà scomenzà a entener mingol canche l vegn rejonà, e la é spervaja che mingol a l'outa la sarà bona de l capir semper mic.

Sie pensier l é che anchecondi la bibliotea la cogn ence mingol vardèr de jir fora da si mures e dai libres per se averjer a vèlch da nef, apontin percheche l é n lech de «comunanza», per se scontrèr e fèr robes adum, e la peissa ence che sie emportanta la colaborazion anter la biblioteche del teritorie, ma endèna l'à giusta scomenzà e la cogn se fèr ite, donca l é amò mingol prest per rejonèr de ativitèdes e programes. De segur chisc meisc che vegn sarà l program de letures per bec «Nati per leggere».

Valentina Manica la speta donca duc i moenac, e no demò ic, te la biblioteca de Moena, che ades en cordanza col Comun l'à mudà mingol i oraries per restèr averta ence la sabeda da doman.

L nef orarie l é de mèrtesc, mercol e vender da les 9:00 fin les 12:00 e da les 14:30 fin les 18:30; de jebia demò domesdi da les 14:30 a les 18:30 e de sabeda da doman da les 9:00 a les 12:00. De domenia e de lunesc la biblioteca resta serèda.

Lucia Gross